

Kärwepredigt 2018

Steffi bestellt Essen

Ouwem Sportplatz sieht ma nit nur die Fussballer schwitze
ab und zu dud ma amol beime Festle zammesitze.
S Pflingstturnier und die Kärwe sän do scho lang etabliert
Awa s künnd a mol vor, dass do e Privatperson logiert.
A e Diedemarin dud die Lokalität für ihrn 40. neis Aach fasse
Und klärt die Reservierung mitm Vorstand dähämm beim Obndasse.
Zum Glück konnt se des uffm kurze Dienstwach kläre,
dann künnt ihr do schomol keener mehr nei die Quere.
Bestellt hot ma gleich reichlich Getränke und as Asse
Ma will sich bei soueme Fest ja a nid lumbe lasse.
Der Jubeltag steht endlich vor de Tür unds is sou weit
dank vorrausschauender Planung wicht sich die Fraa in Sicherheit.
Pünktlich stehe die Gäste uff de Modde und die Feier geht los,
zu dam Zeitpunkt gläbt die Fraa net, dass no was geht nei die Hoß!
Vom dringe ellee wärd ma awa a nid soat! - säicht er zu seire Fraa
Host du de Metzger mit unnerer Lieferung scho gsah?
Üm siewe künnds Asse – säicht se zu ihm Moo
Des konn awa nid sei, dann wärs ja scho seit ere holwe Stunn do!
Die Fraa wird unruhig und rüffd de Metzger oh,
awa do geht laufend nur die Mailbox dro!
Es dauert no e well bis der Metzger sich blicke lösst,
hot dar nix mehr von der geplante Uhrzeit gewössd?
Des Asse wor gut, entspannt war die Lage,

nur der Gastgeberin leid no was quer im Mache.
Sie sücht de Metzger und find n a gleich
Soach emol, is eigentlich dei Uhr geeicht?
Die Uhr läfft rund, do därff sich keener beklache
Awa die Ortsangabe dud emens zur Pünktlichkeit beidrache.
Üm die Nase werd se ganz blass vor Schreck,
höüwe mir wärklich nid üwer die Adresse gered?
Im Gespräch stellt sich rau, se höüwes vergasse,
drüm isses ä wene durch de Ort gereist, des gute Asse.
Die Kambma Turnhalle wor dam Metzger sei erstes Ziel,
awa vorgfunne hot er do nid wärklich viel.
Sei nächste Ohlaufstelle war in Diede zur Röte,
awa s stellt sich rau, des war genauso ä Flöte.
Ratlos stand er do und konnts net fasse,
muss ich des gute Zäüch jetzt ganz alle asse?
Die wachsame Nochbarschaft hot glücklicherweis ogemerkt,
mit deinera Lieferung bist de do völlig verkehrt.
Mit deem Auto musste an de Kambema Sportplatz schnurre,
ma hört sogar scho do hunne die Mäche knurre.
Am End vom Owend warn dann doch alle zufriede,
und s is a keener hungrich gebliewe.
Die Modalitäten hätt die Fraa gscheider vorher olle geklärt,
dann hätt ma a verhinnern könn, dass der Metzger unnötig s Asse durch
die Gegend fährt.

Marcel Fasching

Bei de Kambma Juchnd wärd die fünfte Johreszeit a ausgiebig gfeiert

Dodefür wärd a gonz schö in de Geichnd rümmgeeiert.

Ob Diede, Halwestoad un a Frädeberch

Verkläd wore se als Pilot, Pinguin und Gardezwerch.

Die Mildebercher Lachparade ghörd seit e poor Johr a zum
Pflichtprogramm

do wore die Kerle natürlich a wieder racht stramm.

Ünnerwachs wor uff jeden Fall e gude Runde,

schnall wor do a e Flosche Fernet gedrunge.

Die große Sause find do uffm Marktplatz statt

bei dere Trinkgschwindigkeit und der Restsüße vom Vortag is do
schnall der erschde satt!

De Hemmwach hot sich jeder vorhar eiprogrammiert,

dass ma im Fall der Fälle die Orientierung nid verliert.

Im Stechschritt is dann der erschde wieder Richtung Bahnhof
maschiert

bevor die Sache vollends eskaliert.

Zu seinem Glück steht der Zuch uffm Gleis a scho bereit

dann verliert der Kerle beim Warde a nid sou viel Zeit!

Weils in Kambe a im 21. Johrhunnert alls no ken Bahnhof geit

steht für die letzte poor Kilometer hoffentlich a no n Fahrer bereit.

Er steicht ausm Zuch au und rüffd dehämm o,

Ey Mudda fohr emol in Hädefald an de Bahnhof no!

Noch damm Telefonat fällt seiner Mudda zum Glück no ei
Do kann doch bloß de Busbahnhof gemeent sei.
Mit ihrer Tochter isse e poor Minudde spöda do okumme,
awa weit und Breit höüe se dann Kerle nit gfunne.
Über Umweche hot sich dann awa rauskristallisiert,
dass der Buä anscheinend doch in der onnere Richtung rümmirrt.
Uffeme Bankle in Kleehäübach höüe sen dann uffgegawlt,
zuracht hots hoffentlich dehämm dann e poor Kopfnüss ghachelt.
Noch vier Stunn und etliche Kilometer Fahrwech,
konnt er sich dann a endlich dehämm neis Bett läich.
Wie er nach Kleehäübach kumme is, hot er bis häüt no nit kapiert
er hot sich doch sou ogstrengt dass er die Orientierung nit verliert!
Er spekuliert: Der Schaffner hot wohl in Eigenregie beschlosse,
dasse den Kerle bloß in der onnere Richtung rauslosse!
Pünktlichkeit dud ma bei der Bahn sicherlich vermisse,
Awa über die Fahrtrichtung dun die normalerweise scho Bescheid
wisse!
Kerle! Am beste dusd du dir die Zuchfohrt in Zukunft gänzlich spor,
dann muss dei Mudda a nit sou weit fohr!

Matzes Auto wird eingesperrt

Beim e junge Kerle aus Kambe wars soweit

Die Karre läfft nimme gscheid

Verbrönnt mehr Öl wie Benzin - und des wie Sau!

Und haut hinne zum Auspuff scho de schworze Rach nau.

Bis dass der TÜV uns scheidet säicht ma normalerweis

Awa die Karre dud höchstwarscheinlich vorher scho neis Gras beiß.

E näue Schüssel musst also schnall widda uff de Hof

Weil laff is uf dauer a e wene doof.

Sou weit lösst ers dann doch nit kumme

Und hot im Internet gleich e näue Rakete gfunne.

Allerlei Spielereie sän in dam Auto installiert

Er hofft, dass sich der Händler mit seim Preisvorschlach arrangiert.

In Ascheberch do steht die Nobelkarosse

Awa zu dane Konditione werde se des Auto nit lang uffm Hof stehe losse.

Ellee e näues Auto käff, des hot dar sich nid getraut

Dosdewache hot der n Kumpl wu sich aukennt okhaut.

Uff sei aldes Auto is ja nimme viel verloss,

desdewache traut der sich nur noch mit seinem Firmewache uff die Stross.

Sie fackeln nid lang rümm und fohre gleich los,

und denkt nur : Hoffentlich geht der Schnellschuß nit nei die Hoß!

Beim Autohaus wird direkt vor die Eingangstür rangiert,

Ma will ja nid dass ma beim Laffe zu viel Zeit verliert.

Des Auto steht no do, genau wie im Internet beschriebe,
nocheme kurze Gspräch mitm Verkäufer sän kee Froche mehr offe
gebliebe.

Noch der Probefahrt hat er dann nur noch en Gedange,
die Karre namm ich mit nach Kambe!

Die Formalitäten hot ma kurz vor Feierobnd no geklärt,
bevor der Verkäufer hämm zu Fraa un Kinner fährt.

Wenn ma schomml do sän könne ma a no ewene über de Hof
flaniere,

der Kauf is abgeschlosse, uns kann jetzt nix mehr bassiere.

Sölle die Verkäufer ruhig ihrn Feierobnd moche,
mir könne uns ja no ewene Zeit losse.

Die Autos höüe se jetzt alle unner die Lupe genomme,
jetzt werds Zeit, dass do a langsam widda fortkomme.

Mir wölle hemm, awa des kann doch nid sei

Jetzt sperre die hinner mein Firmewache n Pfoste nei.

S werd versucht de Verkäufer uffm Handy zu erreiche,
awa s geht bloß de AB dro, der wird scho uffm Sofa laiche!

Langsam awa Sicher mächt sich die Verzweiflung brät,
ich höü morche Kundetermin, do kumm ich doch zuspät!

Ratlos gugge sich die zwä o,

wie kumme mir jetzt an des Auto dro!

Der Pfoste is halt a sou platziert,

dass ma do nid sou efach rümmrangiert.

Zum zwädde Mol due se dann üwer de Hof drüflitze
und sahe zum Glück de Chef no im Büro sitze.
Wiesou dass des Auto eisperre dun sen fröche,
der Chef muss für die Antwort nid lang üwerläiche.
Der Mitarbeiterparkplatz wird nachts immer abgsperrt,
dass sich uff unnam Gelände ken Anwohner vererrt.
Schnall beseitigt hot er dann die Barriere,
bevor es schlacht steht ümm damm Kambma sei Karriere.
Für en Fussballer vom TSV ware solche Abkürzung verbote
oder sän des jetz die näüe Kickers DHK Trainingsmethode?
Kerle merk dir efach: s nächste Mol parkste dei Kutsche gscheid
dann bist a flexibler mit der Abfahrtszeit.

Genau häut ist mal wieder Johresdoch,
Von em Betruchsfolld den ma sich gornet vorstell moch.
Dos gonze ist jetzt scho 12 Johr her,
Und immer noch sitzt er tief der Speer.
Normal wärd gfeiert unner Kärwe am zwäte September Wuchenend,
Doch das höüwe unner Gennies aus Warde total verpennt.
Denn dane Großstädter is irgendwann e mol die Erfindung des
Heimattages eigfolle,
Un höüwe ganz vergasse des Fest in unnerer Holle.
Plane die net genau e Fest am heiliche Termin,
Un sie verlange es müsse alle Ortschafte hin.
Der Bua um danns geht muss en Genie in Mathematik und Biologie
sei,
Weil sou genau, plont kenner n Geburtstermin ei.
Der Kerle hot gebimbert wie n große,
Un de Terminkalender vom TSV Kembach mit neigschosse.
Am Kärwesunndoach söll se zur Walt kumm,
wie jeder wöss, scheint an dam Doach immer die Sun.
Der 10 September 2006 ist der Doach um danns geht,
Der Kerle hot sogar die Vorstandschaft ogfleht.
Könne mir net dos ganze boikottier,
Oder irchend en hohe Abgeordnete schmier?

Doch olles bitteln und betteln half nix,
Dar Termin in Warde, der war fix.

Die Kärwe wurd dann eh Wuche noch hinne verläicht,
Jetzt musst da guck, dos sich dos Kind erst eeh Wuche spöter räicht.
Das Mädle is wie berechent am 10 uff die Walt kumme,
Un der Vodder hot se fräudestrohlend in de Orm gnumme.
Dos Mädle hot jo olles richtig gemocht,
Un hot de Vodder fröhlich ogelocht.
Er war de glücklichste Mensch im ganze Universum,
So hot er dos onnere schnall vergasse auserüm.
Ihren Geburtsdoch hot se höüt uff der Kärwe obkallte,
Domit die Kambma Verwandschaft gricht ke Sorchefallte.
Herzlichen Glückwunsch will ich ihr soch,
Den es is ja n gonz besonderer Ehredoach.
Verdient host du dir n besondere Oplaus,
Bist immer Willkomme in unnerm Haus.

Wenn en Junggsell den Bund der Ehe eingeht,
dann geits davor noch emol ä richtige Fet.

30 Kerle sän zamme in die Blumestraße marschiert
Und höüwe de Bräutigam von der Baustelle entführt.

Nach Wärzberch söllts gehe, so wars Vorhowe,
der Bus is awer erst in Dertinge abgfohre.

Der Bollerwagen samt Bier und Bräutigam wurd schnell gepackt,
und scho höüwe se sich uff de Waach üwer de Sonneberg gemacht.

Nach dem harten Marsch üwer einehalb Stund,
wollt am liebste jeder von dane Kerle ä Wuarst im Mund.

Wie s der Zufall so will, is en Handwerksgenosse vom Bräutigam
vorbeikumme,

und hat em en Strauß voll Wuarst um de Arm gebunne.

Die Wuarst hat ollene gutgetan,
so gestärkt konnte se a weiter nach Wärzberch fahrn.

Sicherheitshalber hat ma im Hofbräukeller noch en Haxe inhaliert,
und is dann weiter Richtung Innenstadt marschiert.

Uff m Wach zur Disco leit die e oder onnere Kneipe,
da konnt ma sich bei ä paar Bier a gut die Zeit vertreibe.

Schlussendlich is ma dann an der Disco ohkumme,
zu dam Zeitpunkt hot des awa nimmer jeder ganz klar
wahrgenumme.

Da hat ma ausgiebig gfeiert und a ä wene bussiert,
ihr gläbt doch net, dass sich zu dem Zeitpunkt no jemand geniert.

Langeweile macht sich irgendwann a in dam Lokal bret,
awa für ä Bierle wuanders is es no long net zu spät.

Ä gemeinsames Ziel ließ sich nimmer definiere,
so ließe se sich vom Taxi ins Boot, Air und gewisse Etablissements
chauffiere.

Sou viel unnerschiedliche Lokalitäte höüwe se auserkore,
dobei ging der Überblick üwer die Mannschaft komplett verlore.

Jederer Gruppe wurde der Eintritt verwehrt,
sou hot ma beschlosse, dass ma am gscheitsde gleich hämfährt.

Ins Taxi nei un häm kutschiert,
uff emol hot bei jedem s Handy vibriert.

In der WhatsApp Gruppe hot ener gschriewe,
Wu is dann jetzt der Rest gebliewe?

Die Kerle gugge sich oh und konnte s nid fasse,
höüwe mir jetzt wärklich en in Wärzberch vergasse?

Un wie se sou rede üwer den Spezialist,
fällt ene uff, dass n eichtlich scho üwer zwä Stunn kener vermisst.

Was hot denn der Kerle häüt scho wieder getriewe,
der is doch scho öfters uff der Strecke gebliewe.

Zwä Stunn hot der Kerl sich äle im Zauberberg verschanzt,
entweder gut unnerholde oder neis Delirium getanzt.

Was do passiert is konnt er selbst nimmer rekonstruiere,
wess er s wärklich net, oder will er sich bloß net blamiere?

Fest steht, anscheinend hot s m gfall, sonst wär er net so long äle gebliewe,

und hot net sou wie der Rest sich die Zeit mit Taxi fohre vertrieuwe.

Ma söllt halt zamme blei und net sou viel durch die Gegend fohre, dann kumme alle häm und ma könnt sich n Haufe Geld fürs Taxi spare.

Weil ens is klar, wenn ma äle hämfährt oder durch Wäzberch irrt, einzig un äle der Taxifahrer von der Sache profitiert.